

達觀詩稿

《莊子·知北遊》：「天地有大美而不言，四時有明法而不議，萬物有成理而不說。聖人者，原天地之美而達萬物之理，是故至人無爲，大聖不作，觀於天地之謂也。」大美何止天地？吾爲人子，吾爲人友，吾爲弟子，吾爲人師，舉凡親友朋舊，人情相濡者，無非大美。庚寅以來，二月軍中除役，三月父親過世，四月博論提審，焦急傷痛，風雨併來，何以解憂，唯有詩焉。是集所收，舉目清空者少，低徊人情者多。所以稱達觀者，既誌所居社區之名，亦覺樂從苦來、苦自樂生，捨壓力何來幸福？人情詩理，還應自此達觀參悟之，遂作此序。時辛卯年四月。

〈辛卯父忌〉

南山飄風來，靜葉又動條。焚焰紅蓮開，合爐舊灰覆。
真言招離魂，靈位并家族。超渡無上心，迴向殊勝福。
悔心何淒悲，祭儀自莊穆。今有酒和齋，昔少水與菽。
思子勸回家，忘恩說忙碌。徒然取功名，莫能報舐犢。
莪蒿空折催，薤露怎盈掬。生涯漫行舟，往事如轉轂。
時時夢慈顏，夜夜繞空屋。白髮存高堂，不敢放聲哭。

〈學生問茉莉花革命，余答之〉

魚與熊掌怎兼得，義兮利兮捨或留？生問捐命何輕賤，但恨通膨漲石油。
我說安居誰不願，忍把顛血換自由？民如草芥如螻蟻，君起連苑起高樓。
專制喪鐘誰來撞，小販自焚大街頭。前仆後繼春雷動，遍地鮮花生壑溝。
犁鋤激昂皆兵器，肉身慷慨擋彈榴。活人不及死人馥，今日不做明日愁。
昔同諸生年紀小，天安門中見集遊。驚天動地坦克至，張手無懼死不收。
秋瑾寶刀豪咽曲，復生肝膽崑崙儔。向使烈士惜性命，何來繁榮處境優？

〈寄學長某〉

君住台中吾住北，多年契闊掩山扉。魚來窮轍焦將涸，鳥入高空倦亦飛。
俯首芸窗初願在，折腰升祿本心違。春風何日重傾酒，共話新裁稚子衣。

〈別贈軍中弟兄〉

淡水東來似劍鎗，柳營戈甲躍寒光。千濤壁岸沖無懼，百鍊將兵磨愈剛。
霽日粼粼輝碧海，軍風颯颯鞏金湯。苦甘同處情難捨，回憶長留虎嘯崗。

〈適值河哨，憂父病加重〉

檜衣寂寞夕陽紅，幾處漣漪映釣篷。落葉濤聲風影裡，離人心事水鴻中。

霞迴碧海天無語，淚對青山誰與同。夙夜思歸歸不得，值輪河哨獨忡忡。

〈和人詩〉

六十年來不共天，自由專制怎從權？山河破碎輿情異，黨禁替興儒術孱。
遺老孤懷吟彼黍，書生事業請鳴鞭。極知成敗由時勢，到底是非須擊研。

〈庚寅端午，時台中、宜蘭各寄粽來〉

南北寄來雙粽串，綠裳分髻腹纏麻。蘭陽腴嫩誇新筍，赤炭鮮香炊五花。
節奠忠魂同繫艾，味添鄉思不黏牙。山中飽食銷長日，更眺碧潭舟競撾。

〈庚寅春霽〉

歲徂無逆轉，雨後近清明。風止波瀾絕，雲開氣象宏。
觀全知否泰，守正啓元亨。翳翳餘苔綠，未妨喬木擎。

〈於新店家中眺望國慶煙火〉

火龍望婉婉，光彩奪星妍。銀灑萬絲雨，紅噴百丈泉。
京華重藻飾，國步尙迍邐。將息天逾黑，林寒未噤蟬。

〈大學同學聚會〉

人情如未老，歲月隔重關。蒼狗浮雲變，霜絲心事還。
聚散萍相似，遭逢夢一般。豈愛談年少，唯憐相見艱。

〈滇鄉憶事，時陪父親探親〉

山星涼破夏，田舍水粼粼。泥灶撩新火，風塵話故人。
僂牆條竟近，撫手俚言親。小曲誰重唱，今宵夢未勻。

〈山行觀芒〉

信步登亭望，寒煙隱夕曛。半坡風曳雪，一色草連雲。
樹密塵情隔，雁高懷抱分。相逢憐白首，世事不堪聞。

〈午後雷雨，時聞長江水患〉

轟轟倒挽瀉天池，山幅颯來潑墨詩。可惜林齋涼暑外，江南一帶正流離。

〈基隆兼課最後一日，晨行有感〉

寂腥商港泊吞鯨，輾轉車程天未明。我註古人誰註我，杜蘇陶謝與鍾嶸。

〈又夢亡父〉

人非失去不知憐，營奠營齋徒費錢。相見無期賸有夢，洪鐘一笑似從前。

〈亡父百日〉

百日渾如夢一場，誦完經懺更拈香。侄兒偷把爺名喚，直信人間有斷腸。

〈繳交博論口試本〉

壁立千尋蜀道彎，孤行踽踽汗潸潸。偶逢樵客勞相警，過了此山還一山。

〈讀龍應台《目送》，有憶亡父〉

問吾何日再回鄉，揮別無言佇影長。檢點前塵徒淚下，當時只道是尋常。

〈博論口考結束有感〉

雨打車窗視不清，偶然山現是雷鳴。顛坡過了風煙遠，明日天涯會有晴。

〈中學新職講習，山行有感〉

嶺上晴雲澹似秋，澹秋難治阮囊羞。時經曲路經歧路，不羨山猴羨沐猴。

〈庚寅七夕〉

天衣雲錦種前因，山雨幾回紅葉新。鵲鳥多情還識否？重來已是隔年人。

〈庚寅中元〉

殘燼飄搖上醮棚，香花落盡黯愁生。離魂若識歸鄉路，月正中秋一樣明。

〈員工體檢〉

謀身謀道兩亡羊，碌碌平生爲口忙。詩興漸微何繼起？年收入與體脂肪。

〈猴硐覓貓〉

煤城瓦舊黑氈脂，何事繁華貓不知。最是斜垣幽徑處，來看取靜鬧中時。

〈三峽春暉啓能中心，幫忙做月餅〉

細切慢揉文火煎，杏仁香柚紫蘇綿。人情直似雲前月，偶有缺時還有圓。

〈世博雜題，上海金融中心觀景臺〉

船似擲梭車似蠅，橫看成柱側成稜。登臨莫畏高如許，我輩生涯要履冰。

〈聽萬芳「那些你所不知道的夜晚」演唱會〉

孤芳夜月始含嚬，隻影雲山突轉身。檀口沉浮兒女淚，滄桑我是曲中人。

〈課餘看山〉

少年逃俗愛青崗，其實俗愁無處藏。滿目寂幽滋味冷，看它蒼綠看它黃。

〈三月十日〉

久作紅塵客，對書如對讎。三匝啼烏鵲，春雨冷於秋。

〈驚聞仙台地震〉

家與山根裂，濤從海上來。橫流都是淚，流不到泉臺。